

南
北
史
合
注

欽定四庫全書

南北史合注卷一百九十一

明 李清 撰

北史一百五

項氏高陽氏當唐堯時高陽氏有

以官命族為理氏歷夏殷之季其

後李徵字德靈隸為翼隸中吳伯以直道不容得罪於

紂其妻契和氏攜子利貞逃隱伊侯之墟食木子得全

遂改為李氏周時裔孫曰乾娶於益壽氏女嬰敷生子耳字伯陽為柱下史子孫散居諸國或在趙或在秦在魏者為段干大夫段干木其後也別孫惺為魏文侯興富國之術在趙者曰曇以功封柏人武安君牧其後也在秦者名興族為將軍生子伯祐建功北狄封南鄭公伯祐生二子平燕內德子信為秦將鹵燕太子丹信孫元曠仕漢為侍中元曠弟仲翔位太尉仲翔討叛羌於素昌一名狄道仲翔臨陣隕命葬狄道川因家焉史記

李將軍傳所云其先自槐里徙居成紀實始此也仲翔
曾孫廣仕漢歷文景武三帝位前將軍立功沙漠廣子
當戶椒敢當戶子陵戰沒匈奴椒敢歷侍中郎中令闕
內侯生子禹位至侍中並事具漢史禹生承公承公生
蜀郡太守先先生長宗長宗生博士況況生孝廉本本
生巴郡太守次公次公生臨淮太守軌軌生積弩將軍
隆隆生雍雍字備熙仕曹魏歷尚書郎濟北東莞二郡
太守雍生柔柔晉舉秀才為相國從事中郎北地太守

雍生侖高亮果毅有智局晉末大亂與從兄卓居相國
晉王保下卓位相國從事中郎保政刑不修卓率宗族
奔張寔侖亦隨焉因仕張氏為驍騎左監侖本名良婦
姓梁氏涼公張駿謂侖曰卿名良妻又姓梁令子孫何
以目其舅氏昔耿侖以弱年立功啓中興之業吾方賴
卿有同耿氏乃使名侖歷天水太守衛將軍封安西亭
侯卒年五十六贈武衛將軍子昶幼有名譽年十八亡
昶子嵩字玄盛小字長生即西涼武昭王也遺腹而誕

祖母梁氏親加撫育幼好學性沈敏寬和美氣度通涉
經史尤長文義及長頗習武藝誦孫吳兵法常與呂光
太史令郭磨及同母弟宋繇同宿磨起謂繇曰君當位
極人臣李君必有國土之分家有駟黃馬生白額駒此
其時也及呂光末段業自稱涼州牧以昭王為効穀令
燉煌護軍馮翊郭謙沙州中從事燉煌索仙等以昭王
溫毅有惠政推為寧朔將軍燉煌太守昭王初難之會
宋繇仕業告歸言於昭王曰兄忘郭磨言邪白額駒今

已生矣乃從之尋進號冠軍將軍稱藩於業業僭稱涼王其右衛將軍索嗣構昭王於業乃以嗣為燉煌太守率騎而西昭王命師擊走之於是晉昌太守唐瑤移檄六郡推昭王為大都督大將軍涼公領秦涼二州牧護羌校尉依竇融故事昭王乃大赦境內建元庚子追崇祖弇景公考昶簡公大閭霸府置左右長史司馬從事中郎備置寮案廣闢土宇屯玉門陽關屯田積穀為東討之資立靖恭堂以議朝政而閱武事圖贊自古聖帝

明王忠臣孝子烈士貞女親為序頌明鑒誠義當時文武羣公寮佐亦皆圖讚所志五年改元建初遣舍人黃始梁興間行奉表於晉是歲乃自燉煌徙都酒泉又以表未報復遣沙門法泉間行通表建鄴時百姓樂業請勒銘酒泉乃使儒林祭酒劉彥明為文刻石頌德又有白狼白兔白雀白雉白鳩等集於園間羣下以為白祥金精所誕皆應時雖而至又有神光甘露連理嘉禾衆瑞請史官記其事昭王從之上巳日讌於曲水命羣寮賦

詩昭王親為之序於是寫諸葛亮訓誡以勗諸子昭王以緯世之量為羣雄所奉兵無血刃遂啓霸業乃修燉煌舊塞堯謚武昭王廟號高祖陵號建世武昭王十子譚歆讓恂恂翻豫宏眺亮世子譚早卒後主諱歆字士業武昭王第三子王薨府寮奉為都督大將軍涼公領涼州牧護羌校尉大赦境內改元嘉興尊母尹氏為太后在位四年為沮渠蒙遜所敗國亡武昭王以魏道武天興二年立後主以明元太常五年亡據河右凡二世二

十一年世子重耳奔江左遂仕宋後歸魏位弘農太守
即皇室七廟之始也後主弟讓雅量凝重善謀畧位寧
朔將軍領西羌校尉輔國將軍晉燉煌太守新鄉侯贈
驃騎大將軍謚曰穆讓弟愔位晉昌燉煌太守愔弟恂
有幹畧為酒泉燉煌太守國亡為沮渠梁氏攻逼自殺
恂弟翻小字武彊英雄秀出有雄畧位車騎將軍祈連
酒泉晉昌郡太守翻弟豫位西海太守豫弟宏位前將
軍中華令宏弟眺位左將軍眺弟亮位右將軍寶字懷

素小字衍孫晉昌太守翻子沈雅有度量驍勇善撫接
過家難為沮渠蒙遜囚於姑臧歲餘與舅趙唐契

魏書趙唐契作廣契

北奔伊吾臣於柔然其遺民歸附者稍至二千寶傾身
禮接甚得其心衆皆樂為用每希報雪屬太武遣將討
沮渠無諱於燉煌無諱損城遁寶自伊吾南歸燉煌遂
繕城府規復先業遣弟懷達奉表歸誠太武嘉其其忠
款拜懷達散騎常侍燉煌太守別遣使授寶使持節侍

中都督西垂諸軍事鎮西大將軍開府儀同三司領護
西戎校尉沙州牧燉煌公乃鎮燉煌四品以下聽承旨
假授其君五年入朝遂留京師累內都大官文成初代
司馬文鎮懷荒改授鎮北將軍太安五年卒賜命服一
襲贈本官謚曰宣有六子承茂輔佐公業沖公業早卒
承字伯業少有謀畧初寶欲歸款僚庶多異議承時年
十三勸寶速定大計遂決寶仍令承隨表入賀太武深
相器異禮遇甚優賜爵姑臧侯後遭父憂居喪以孝聞

承應傳先封以自有爵乃以本封讓弟茂時論多之承
方裕有鑒裁為時所重文成末以姑臧侯出為龍驤將
軍榮陽太守為政嚴明甚著聲稱延興五年卒贈使持
節大將軍雍州刺史謚曰穆長子韶字元伯學涉有器
量與弟彥虔並孝文賜名韶雅為季父冲所知重延
興中補中書學生襲爵姑臧侯除儀曹令時修改車服
及羽儀制度皆令韶典之遷給事黃門侍郎後依降降
侯為伯兼大鴻臚卿黃門如故孝閔將遷都詔引侍臣

訪古事韶對曰洛陽九鼎舊所七百攸基地則土中實
均朝貢惟王建國莫尚於此帝稱善遷太子右詹事尋
罷左右仍為詹事肆州大中正出為安東將軍哀州刺
史帝自鄴還洛韶朝於路帝言及庶人恂事曰卿若不
出東宮或未至此宣武初徵拜侍中領七兵尚書除撫
軍將軍并州刺史以從弟伯尚同咸陽王禧遜除宮辭
久之無將作大匠敕參定朝議律令及呂苟兒反於秦
州除撫軍將軍西道都督行秦州事與右衛將軍元麗

率衆討之事平即真璽書勞勉復其先爵時隴右新經師旅人不安業韶善撫納甚得夷夏心孝明初自相州刺史入為殿中尚書行雍州事後以中軍大將軍吏部尚書出為冀州刺史清簡愛民政績之美聲冠當時孝明嘉之就加散騎常侍遷車騎將軍賜劔珮貂蟬各一具驂駟馬一匹并文服寢具韶以年及懸車抗表遜位優旨不許轉定州刺史常侍如故及赴中山冀州父老皆送出西境相聚而泣二州境既連接百姓素聞其德

州內大安正光五年卒官年七十二贈使持節散騎常
侍車騎大將軍司空公雍州刺史謚文恭既葬後有冀
州兵千餘人戍荊州還經韶墓相率培塚數日方還其
遺愛如此永安中以克定秦隴功追封安成縣伯長子
璵字道璠溫雅有識量視永平二年釋褐太尉府行參
軍累遷尚書倉部郎中後汝南王悅為司州牧悅性質
疎冗情識不倫朝廷以璵器望兼美開於政事擢為悅
府長史兼知州務甚得毗贊之方除司州別駕遷光祿

少卿永安初襲封安城縣伯及遷都於鄴留瑛於後監
掌府藏撤運官廟材木以明幹見稱加征南將軍金紫
光祿大夫尋兼給事黃門侍郎監典書事出為東徐州
刺史為政清靜吏民懷之解州還以老疾不求仕進齊
受禪追瑛兼前將軍尊從於園邱行禮又攝護軍陪神
武主入太廟瑛意不願策名兩朝雖以宿德耆舊數被
徵過事即絕朝請文宣亦曾命瑛預華林宴顧訪舊事
甚重之天保四年卒年七十二子詮任城郡守贈涇州

刺史

北齊書曰瑛三子詮韞誦韞與陸令萱女弟私通令
萱奏授太子舍人誦女妻穆提婆子懷鹿起遷臨漳令
儀同三司

子伯卿太師府參軍事伯卿子師上聰敏好學雅有詞
致外祖魏收無子惟一女生師上甚愛重之童貫便自教
屬大後與范陽盧公順俱為符璽郎待詔文林館與博
陵崔君洽同志反善從駕晉陽寓居僧寺朝士謂之康

寺三少隋煬帝居第奏為王府記室終於揚州諡弟謚
位高陽郡守司農卿安州刺史謚子千學齊武平中尚
神武女浮陽長公主拜駙馬都尉南青州刺史謚弟誦
位假儀同三司臨漳令誦弟世韞太子舍人殿中郎璵
子孫繁衍行人號其宅為孝東徐村璵弟瑾字道瑜美
容貌有才學特為韶鍾愛清河王懌甚知賞之懌為司
徒辟參軍事遷通直散騎侍郎與給事黃門侍郎王遵
業尚書郎盧觀典修儀注王盧即瑾外兄臨淮王彧謂

瑾等曰卿等三儁共掌帝儀可謂甥舅之國及孝明崩
上諡策文瑾所製也孝莊初於河陰遇害贈冠軍將軍
齊州刺史子產之容貌短陋撫訓諸弟愛友篤至其舅
盧道將稱之曰此兒風調足為李公家孫位北豫州司
馬子仲膺以學行稱位太子洗馬任周為東京少吏部
上士隋開皇中卒於荊州總管司馬產之弟雋之清通
好文學齊天保初恩太子洗馬行陽翟郡守為政清靜
吏民稱之遷尚書考功郎中遇文宣昏縱見害時人寃

之舊之弟壽之位梁州中從事性貞介不負於人壽之弟禮之位司徒騎兵參軍與妻鄭氏相重妻先亡遺言終不獨死未幾禮之足發腫夢妻云煮小麥漬之即差如其言反創而卒禮之弟行之小字師子簡靜善守門業多識前言往行而不以文學自名居喪盡禮與兄弟深相友愛任齊歷都水使者齊郡太守帶青州長史任城王敬暉之州人號李御史仕周為冬官府司寺下大夫隋開皇初除唐州下澆郡太守稱疾不行卒行之風

素夷坦為士友所稱其舅子盧思道深所愛好常贈詩
云水衡稱遠人潘揚有世親形骸預冠蓋心思出鷲塵
時以為實錄及疾內外多為求醫行之曰居常待終士
之道也貧既愈富和知死不如生一皆抑絕臨終命家
人薄葬口授墓誌以紀其志曰隴西李行之以某年某
月終於某所年將六紀官歷四朝道叶希夷事忘可否
雖碩德高風有領先構而立身行紀無愧夙心以為氣
變則生生化曰死生者物之用死者人之終有何憂喜

於其間哉乃為銘曰人生若寄視死如歸茫茫大夜何
是何非言終絕二子夷道行之弟凝之為光州中從事
非其所好毘勉而就秩滿徑還冀州棗強野舍凝之明
本草藥性恒以服餌自持雖年將耄及而志力不衰篤
好古文精心典禮以之終老未嘗懈倦隋仁壽中卒產
之兄弟並有器望邢子才為禮之墓誌云食有奇味相
待乃滄衣無常主易之而出時以為實錄諸父相親皆如
姊妹舊之死諸弟不避當時凶暴行喪極哀趙郡李榮

來弔之歎曰此家風範海內所稱今始見之真吾師也
欲與連類即日自名勞之瑛弟瓚少有風尚辟司徒參
軍事卒贈漢陽郡太守韶弟彥字次仲有學業孝文初
舉秀才除中書博士轉諫議大夫後因考課降為元士
尋行主客曹事徙郊廟下大夫時朝儀典掌咸未周備
彥留心考定號為稱職孝文南伐彥諫曰臣以為蕞爾
江閩未足親勞鑿駕頻表雖不見納而以至誠見嘉及
六軍次淮南加恢武將軍西翼副將軍帶齊郡太守累

遷平東將軍徐州刺史延昌二年夏大霖雨川瀆皆溢
彥相水陸形勢隨便疏通無淹潰之害朝廷嘉之頻詔
勞勉入為河南尹累遷度支尚書出為撫軍將軍秦州
刺史時破六韓拔陵等反於北鎮二夏幽涼所在蜂起
而彥刑政甚嚴

魏書曰彥刑政過猛為下所怨

正光五年六月城人薛珍劉慶杜超等因四方離叛突
入州門害彥推其黨莫折大提為帥永安中追贈侍中

驃騎大將軍司徒公雍州刺史謚孝貞子變少有風望
位司徒王薄卒贈太常少卿子士有雅望位高都太守
變弟充字德廣弱冠太學博士大將軍蕭寶夤西討德
廣為行臺郎募衆而征戰捷乃手刃仇人啖其肝肺覺
寶夤有異志挺身歸闕朝廷加爵辭不受寶夤遂與万
俟醜奴同反大行臺尔朱天光討之請德廣為從事中
郎天光用其其遂定秦隴以功除中散大夫痛父非命
終身不食酒肉妹夫盧元明嗟重之子士英有文才王

遵業以女妻之次僧伽修整篤業不應辟命時鄭子默
有名於世僧伽曰行不遁道文勝其實郭林宗所謂牆
高墓下雖得必喪此之徒也竟如言尚書袁叔德來候
僧伽先減僕從然後入門曰見此賢令吾羞對軒冕及
卒叔德為懷舊詩曰平生寡俗累終身無世言其見重
如此僧伽弟法藏內清介位員外郎德廣弟德顯位散騎侍
郎贈東秦州刺史德顯弟德明敦重有器局位高陽太
守贈光祿少卿光州刺史彥弟虔太和初為中書學生

累清河太守屬京兆王愉反虔棄郡奔闕宣武聞虔至
謂左右曰李虔在冀州日久思信著物今拔難而來衆
情自解矣乃授虔別將令軍前慰勞事平轉長樂太守
延昌初冀州大乘賊起令虔以本官為別將與都督元
遙討平之遷後將軍燕州刺史累散騎常侍安東將軍
兖州刺史追論平冀州功賜爵高平男永安三年卒於
驃騎大將軍開府儀同三司年七十四贈侍中驃騎大
將軍太尉公都督冀定瀛三州諸軍事冀州刺史謚宣

景長子暎位尚書左外兵郎孝莊初於河陰遇害贈度
尚書安東將軍青州刺史二子哀爽並為郡守以幹局
見知暎弟仁曜員外散騎侍郎太尉錄事參軍與兄暎
同於河陰遇害贈散騎常侍左將軍兗州刺史子搆學
尚有風儀齊天保末為尚書郎終光州司馬仁曜弟皓
位散騎侍郎亦遇害河陰贈征鹵將軍涼州刺史子士
元士操武定中並儀同開府參軍事皓弟曉事列於後
度弟綖卒於司農少卿贈龍驤將軍豫州刺史子諤字

義興有幹局起家太學博士孝莊初歷濟廣二州刺史
加散騎常侍節閔時與第三弟通直散騎常侍義真第
七弟太常少卿義邕同為爾朱仲遠所害當孝莊居藩
日以外親甚見親昵及即位特蒙信任爾朱榮之誅義
邕預其事並及禍孝武初

本書孝武作節閔誤節閔時爾朱方專政無追贈理
考之魏書作出帝出帝孝武也今正之

諺贈侍中驃騎將軍吏部尚書冀州刺史義真贈前將

欽定四庫全書

卷一百九十一

軍齊州刺史義邕贈安東將軍青州刺史諺次弟義順
司空屬第四弟義遠國子博士孝莊初並於河陰遇害
贈散騎常侍征東將軍雍州刺史承弟茂文成未襲父
爵鎮西將軍燉煌公孝文初歷光祿大夫西兗州刺史
例降為侯茂性謹慎以弟冲寵盛懼於盈滿以疾求遜
位孝文不奪其志聽食大夫祿還私第因居中山自是
優游卑舍不入京師卒年七十一謚恭侯子靜襲東平
原太守卒子遐襲遐有几案才位河內太守

魏書曰爾朱榮稱兵向洛次其郡境遐聞榮推奉莊
帝遂開門謁候

從孝莊南渡河於河陰遇亂兵為所害事寧追贈散騎
常侍車騎大將軍尚書右僕射秦州刺史封盧鄉伯靜
弟孚恭慎篤厚歷汝南中山二郡太守孝莊初以外親
歷鎮東將軍滄州刺史加散騎常侍孚弟季安粗涉書
史北海王顥為關西都督引為長史委以戎政卒於軍
贈征鹵將軍涼州刺史茂弟輔有器望解褐中書博士

太和中孝文為咸陽王禧納其女為妃除鎮遠將軍潁州太守帶長社戍輔綏懷招集甚得邊和卒於郡贈征南將軍秦州刺史謚襄武侯長子伯尚少有重名弱冠除祕書郎孝文每云此李氏千里駒稍遷通直散騎侍郎敕選太和起居注宣武初兼給事黃門侍郎坐與咸陽王禧謀反誅伯尚弟仲尚儀貌甚美少以文學知名年二十著前漢功臣序贊及季父司空沖誅高聰邢巒見而歎曰後生可畏非虛言也起家京兆王愉府參軍

坐兄事賜死仲尚弟季凱沈敏有識量坐兄事與母弟
俱徙邊久之會赦免遂居晉陽沈廢積年後歷并州安
北府長史孝明崩爾朱榮陰圖義舉季凱預謀孝莊踐阼
徵拜給事黃門侍郎封博平縣侯加散騎常侍祕書監
中軍將軍後爾朱世隆以榮之死謂季凱通知見害孝武
初追贈侍中驃騎將軍吏部尚書定州刺史季凱弟延
慶位陳留太守金紫光祿大夫延慶弟延度衛將軍安
德太守輔弟佐字季翼有文武才幹孝武初兼散騎常

侍使高麗以稱旨拜常山太守懷懷州刺史山陽公後
轉相州刺史所在有稱績後拜安遠將軍敷與征南將
軍城陽王鸞安南將軍廬陽烏等攻赭陽各不相節度
諸軍以敵強故班師佐簡精騎二千逆戰為敵所敗坐
徙瀛州為民駕征宛鄧復起佐假平遠將軍統軍以功
魏書曰新野太守劉忌憑城固守佐率所領攻拔之
矣

封涇陽縣子汜北既平以佐為廣陽王嘉鎮南府長史

加輔國將軍別鎮新野及大軍凱還孝文執左手曰沔北洛陽南門卿既為朕平之亦勉為朕善守

冊府元龜曰孝文克宛城拜劉長猷南陽太守駕旋詔之曰昔曹公克荊州留滿寵於後今委卿以郡兼統戎馬非獨綏安初附乃以干城相托賜縑二百疋孝文崩遺敕以佐行荊州事佐在州威信大行邊人悅附前後歸者二萬餘家尋正刺史宣武初徵兼都官尚書卒年七十一贈秦州刺史謚曰莊子遵襲遵豪爽有

父風卒於司空司馬贈洛州刺史子果襲位司空謚議
參軍武定中坐通西魏見殺遵弟東字休賢郡辟功曹
以父憂去職遂終身不食酒肉屏居鄉里司空任城王
澄嘉其操尚以為參軍事累遷濟州刺史卒贈殿中尚
書相州刺史東弟挺字神儻小名提少以才學知名為
太常劉芳所賞歷中書侍郎太常少卿荊州刺史時梁
將曹敬宗來寇攻圍積時又引水灌城城不沒者數板
神儻循撫兵人戮力固守詔遣都督崔暹別將王熊襲

行等赴援敬宗退走時經寇賊後城外有露骸神僞令
收葬之徵拜大司農孝明未除鎮軍將軍行相州事時
葛宗南逼神僞憂懼故墜馬傷足仍停汜郡有詔追還
孝莊即位以神僞人望拜散騎常侍殿中尚書追論固
守荊州功封千乘縣侯轉中書監吏部尚書神僞意尚
風流情在推引人物爾朱榮有所用人神僞不從見怒
魏書曰神僞推引人物不能守正奉公無多聲譽有
鉅鹿人李炎上書言其失爾朱榮曾補人為曲陽令

神儁以階懸不用榮大怒謂神儁自樹親黨排抑勲人

懼啓求解官除右光祿大夫尋屬爾朱兆入京乘輿幽
執神儁逃民間孝武初歸闕拜散騎常侍驃騎大將軍
左光祿大夫儀同三司孝靜初除驃騎大將軍華州刺
史入為侍中卒贈尚書左僕射司徒公雍州刺史神儁
風韻秀舉博學多聞朝廷舊章及人倫世族多所諳記
篤學好文雅老而不輟凡所交遊皆一時名士汲引後

生為其光價四方才子咸宗附之滎陽鄭伯猷常云從
舅為人物宗主在京洛時琅琊王誦亦美神儻故名其
子曰儻庶其似之梁武帝雅重其名常云彼若遣李神
儻來聘我當令孝綽往其見重如此頸多鼠乳而性通
率不持檢度少年之徒皆與爽狎比遷鄴於路見犬溫
子昇戲曰為是宋鵲為是韓盧神儻曰為逐丞相東走
為共帝女南徂沙苑之敗神儻策眇馬而走曰丁掾力
馬倒曰丁掾誤我其不拘若此既不能方重識者以此

為譏喪二妻又欲娶鄭巖祖妹神僞從甥也盧元明亦將為婚遂至紛競二家聞於巖祖門鄭卒歸元明神僞惆悵不已時以為鳳德之衰承弟沖

愚按諸李中惟沖功名顯魏李文時故特改列傳

沖子延寔字禧性溫良少為太子舍人宣武初襲父爵
清泉縣侯孝莊即位以母舅超授侍中太保封濮陽郡
王延寔以太保犯祖諱又以王爵非庶姓所宜固辭徙
濮陽郡公改授太傅尋轉司徒公出為使持節侍中太

傳錄尚書事東道大行臺都督青州刺史

伽藍記曰延寔臨行奉辭帝謂寔曰懷搏之俗世號難治舅宜好用心寔曰臣久乞開退陛下渭陽興念寵及老臣使夜行罪人裁錦萬里謹奉明敕懷搏者謂齊土俗薄太守初入境皆懷搏而叩以美其意及代還以搏擊之言其向背速於反掌也

爾朱兆入京乘輿幽繫延寔以外戚見害於州館孝武初反葬洛陽贈使持節侍中太師太尉公錄尚書事都

督雍州刺史謚孝懿長子或字子文尚孝莊姊豐亭公主封東平郡公位侍中左光祿大夫中書監驃騎大將軍開府儀同三司廣州刺史或性豪俠尔朱榮之死武殺之士皆或所進孝靜初陷法見害

魏書曰或任俠交遊輕薄無行愚謂能殺尔朱榮為朝廷翦除權奸者亦高氏父子所深忌也故魏收詆之至所坐何法收何不著明其為高氏所陷無親

尋詔復本爵子道端襲或七子並公主所生以道德仁

義禮智信為名第四子義雄有識悟勤學手不釋書仕
齊位瑯琊郡守義雄弟禮成最知名禮成字孝諧年七
歲與姑子蘭陵太守滎陽鄭顥隨魏孝武入關顥母每
謂人曰此兒平生未嘗回顧當為重器及長沈深有行
檢不妄通賓客在西魏歷負外散騎常侍周受禪拜平
東將軍散騎常侍時貴公子皆競習弓馬被服多為軍
容禮成雖善騎射而從容儒服不失素望後以軍功拜
車騎大將軍儀同三司賜爵修陽侯拜遷州刺史時朝

廷有所徵發禮成以蠻夷不可擾擾必為亂上表固諫
武帝從之伐齊之後從帝圍晉陽齊將席毗羅率精兵
數千拒帝禮成力戰擊退之加開府進封冠軍縣公歷
北徐州刺史民部中大夫禮成妻竇氏早沒知隋文有
非常之表遂聘帝妹為繼室及帝為丞相進上大將軍
遷司武上大夫妻以心膂及受禪進封絳郡公賞賜優
洽累遷襄州總管左大將軍時突厥屢為寇患緣邊要害
多委重臣拜寧州刺史以疾徵還京終於家子世師位

度支侍郎禮成弟智源有器量仕齊卒於高都郡守智源弟信則方雅廉慎齊武平中位南陽王綽大司馬屬信則形短中書侍郎頓邱李若戲之曰弟為府屬可謂名以定體信則曰名以定體豈過劣也入周為東京司門下大夫隋開皇中卒於汴州刺史或弟彬其父延寔既別封彬襲祖爵清泉縣侯卒於左光祿大夫贈驃騎大將軍光祿勳齊州刺史謚曰獻子桃枝襲彬弟彰位通直散騎侍郎從父在青州同時遇害贈左將軍瀛州

刺史延寔弟休纂小字鐘羌頗有父風位終太子舍人
贈驃騎大將軍尚書令司徒公雍州刺史追封高陽郡
公子昂襲昂魏末為廣平太守齊天保中卒於光祿卿
昂子道隆有才識明剖斷仕齊位并省尚書左丞隋開皇
中為尚書北部侍郎休纂弟延孝位尚書屯田郎中於
河陰遇害贈侍中車騎大將軍司空公定州刺史進封
臨穎縣公韶從弟仲遵有器業彭城王勰為定州
請為開府參軍累遷營州刺史時四方州鎮逆叛相續

營州城內咸有異心仲遵單車赴州乃至與大使盧同以恩信懷誘率皆安帖後孝明又遣盧同為行臺壯出慰勞同疑人情難信聚兵將往城人劉安定就德興等先有異志謂欲圖已遂執仲遵害之韶從祖抗自涼州渡江左任宋歷晉壽安陸東萊三郡太守抗子思穆有度量善談論工草隸為當世所談太和十七年攜家累自漢中歸魏位都水使者及駕南伐平南陽以功賜爵樂平子宣武踐阼進為伯累遷京兆內史在郡八年頗

有政績卒於營州刺史贈安東將軍華州刺史有子十四人嫡子斌襲位散騎侍郎早卒斌兄獎字道休為孝莊所親起贈思穆衛將軍中書監左光祿大夫謚武宣獎以戚里恩澤賜爵廣平侯歷中書侍郎兼散騎常侍聘梁使主齊天保初兼侍中冀瀛滄三州大使觀察風俗還拜魏尹卒贈濟州刺史中書令子瓌位中書舍人黃門郎韶族弟琰之字景珍小字墨蠡少知名號神童從父冲雅所歎異每曰興吾宗者其此兒乎恒資給所

須愛同己子弱冠舉秀才不行曾遊河內北山便有隱
適意會彭城王勰辟為行臺參軍苦相敦引沖又遣信
喻之久乃應召尋為中尉李彪啟兼著作郎修國史累
轉中書侍郎司農少卿黃門侍郎仍修國史三遷至太
常卿孝莊初太尉元天穆北討葛榮以瑒之無御史中
尉為北道軍司遷除征東將軍仍兼太常出為尚書左
僕射三荆二郢大行臺瑒之雖以儒素自業每語人曰吾
家世將種猶有關西風氣及至州後大好射獵以示威

武爾朱兆入洛陽太守趙修延以琰之孝莊外戚誣琰
之規奔梁襲州城遂被囚執修延仍自行州事城內人
斬脩延還推琰之復州任孝武初徵兼侍中車騎大將
軍左光祿大夫儀同三司永熙二年卒朝廷悼惜之贈
侍中驃騎大將軍司徒公雍州刺史謚文簡琰之少機
警善談論經史百家無不悉覽朝廷疑事多所訪質每
云崔博而不精劉精而不博我既精且博學兼二子謂
崔光劉芳也論者許其博未許其詳又自誇文章從姨

兄常景笑而不許每休閑之際恒閉門讀書不交人事
常謂人曰吾所以好讀書者本不求身後名但異見異
聞心之所願是以孜孜搜討欲罷不能豈為身名而勞
七尺也此乃天性非為力强前後再居史事無所編緝
安豐王延明博聞多識每有疑滯常就瑱之辨析自以
為不及也二子網慧並從孝武入關網位宜州刺史儀
同三司子充節少慷慨有英畧隋開皇中頻以行軍總
管擊突厥有功位上柱國武陽郡公朔州總管甚有威

名為鹵所憚後有人譖其謀反徵還京帝怒之充節素
剛憂憤卒子大亮曉字仁畧太尉度之子少簡素博涉
經史早有時譽釋褐負外郎散騎侍郎尔朱榮將立孝
莊曉兄弟四人與百寮俱往迎其夜曉衣冠為鼠所噬
不成行而免其三兄皆遇害曉乃攜諸猶子微服潛行
避難東郡行至成皋為滎陽令天水閻信所疑辟易左
右謂曉曰觀君儀貌豈是常倫古人相知未必在早必
有急難須悉心以告天下豈獨北海孫賓碩乎曉以信

有長者言具告情實乃厚相資給以免永安初累授除
前將軍太中大夫天平初遷都於鄴曉寓居清河依從
母兄崔陵鄉宅陵給良田三十頃曉遂築室居焉時豪
右子弟悉多驕恣請託暴亂州郡不能禁止曉訓勗子
弟咸以學行見稱時論以此多之曉自河陰家禍後屬
王途未夷無復宦情備在名級而已及遷都後因退私
門外兄范陽盧叔虎勸令出仕前後數四確然不從武
定未齊大襄嗣事高選察察召曉及前開府長史房延

祐並為外兵郎歷頭邱太守天保中頻歷廣武東二郡
太守所在有惠政為吏民所懷卒於郡贈本官將軍海
州刺史三子伯山仲舉秀遠仲舉本名超以字行性方
雅善制白晳美鬚眉高簡宏達風調疎遠博涉經史不
守章句業至於吉凶禮制親表咸取則焉弱冠仕齊為
襄城王淸大司馬參軍事時尚書左僕射元文遙以令
長之徒率多寒賤奉請革選妙盡高資仲舉范陽盧昌
衡等八人同見徵用以仲舉為司州修武令仲舉蒞以

寬簡人號寬明時昌衡為平恩令人號恩明故時稱盧
李思寬之政武平初持節使南定州州人並是蠻左接
帶邊嶂仲舉具宣朝旨邊服清謐朝廷大嘉之還授晉
州別駕及周師圍晉州外無救援行臺左丞侯子欽內
圖離貳欲與仲舉謀憚其嚴正將言而止者數四仲舉
揣知其情乃謂之曰城危累卵仰賴於公何以欲言還
止子欽曰告急官軍永無消息勢之危急旦夕不謀意
欲不坐受夷戮歸命有道於公何如仲舉正色曰公於

欽定四庫全書

卷一百九十一

皇家沒齒非谷臣子之義固有常道何至今日翻及此
言子欽懼泄夜投周軍城尋破周將梁士彥素聞仲舉
名與言時事仲舉曰僕世居山東受恩高氏今國維不
張遠勞師衆不能死於臣道豈敢干非其義士彥曰百
里左車不無前事見逼不已仲舉乃曰今官軍遠來方
申弔伐當先德澤弘招納之畧令所至之所歸誠有地
所謂王者之師征而不戰也士彥深以為然益相知重
初城敗後公私蕩然軍人簿帳悉亡毀戶口倉儲無所

憑據事無大小士彥一委仲舉推尋勾當絲髮而無遺
甚於軍用有助鄴城平仍將家隨例入關仲舉以親故
流離情不願住妻伯父京兆尹博陵崔先猷留不許去
固辭乃得還鄴尋有詔素望舊資命州郡勸仲舉懼嚴
命而至補秋官賓部上士深乖情願乃取急言歸隋開
皇中秦王俊鎮洛州召補州主簿友人蜀王府記室范
陽盧士彥謂仲舉曰丈人往經徵辟每致推辭何為忽
爾降德仲舉笑曰屈伸之事非子所知尋被敕追赴京

朝廷以仲舉婆娑州里左降為隆州錄事參軍尋以疾歸以琴書自娛優遊賞逸視人世茂如也會朝廷舉士著作郎王邵又舉以應詔以前致推遷為責除冀州清江令未幾以疾還後以資例授帥都督洛陽令彭城劉逸民謂仲舉曰君之才地遠近所知久病在家恐貽時論且以為武職差獲自安仲舉曰吾性本疎惰少無官情豈以垂老之年求一階半級所言武職挂徐君墓樹耳竟不起終於洛陽永康里宅當時名賢莫不傷惜之

此傳曲曲文飾言多支離亦孫傳其祖不得不然耳
二子大師行師大師守君威幼而爽悟神情警發標格
嚴峻人並敬憚之身長七尺五寸風儀甚偉好學無所
不窺善綴文備知前代故事若指諸掌商較當時人物
皆得其精弱冠州將賀蘭寬名補主簿寬當時位望又
與大師年事不侔初見言未及終便改容加敬曰名下
故無虛士今者非以相勞自望坐嘯有託耳每於私室
接遇恒盡忘年之歡俄以資調補左翊衛率尋除冀州

司戶叅軍煬帝初改州為郡仍除信都司戶書佐及大業暮年王塗弛紊居官者率多侵漁大師獨守清戒無所營求家益窘迫郡丞鞠孝核益相歎服曰後凋歲寒於公見之十年遷渤海主簿及竇建德據有山東被召為尚書禮部侍郎武德三年使於唐因送同安公主遂求和好使畢還至絳州而建德違約助王世充抗王師於虎牢高祖大怒命所在拘留其使世充建德尋平遂以譴徒配西會州大師少時嘗筮仕長安遇日者姓史

因使占時有從兄子同妹夫鄭師萬河東裴寂同以宿
衛簡入文資各使視即日官位及將來所至史生曰裴
二及李皆當依資叙用然裴君終至台輔鄭非直今歲
虛歸後歲亦當本資不叙指大師曰君才雖不減趙元
叔恐賦命亦將同之言子同亦無遠到時大師弟行師
亦預賓貢因問死生吉凶生曰此郎雖非裴君之匹亦
至方伯既而大師及子同裴寂並以資補州佐師萬當
年差舛明年以齊資不叙任益州新都縣尉及武德初

裴寂任尚書左僕射魏國公大師至是遷播因獨笑曰
史生之言驗矣行師貞觀中厯太常寺丞都水使者邛
州刺史皆如史生占大師既至會州忽忽不樂乃為羈
思賦侍中觀公楊恭仁時鎮涼州見賦異之召至河西
深相禮重日與遊處大師少有著述志常以宋齊梁陳
魏北齊周隋南北分隔南書謂北為索鹵北書指南為
島夷又各書其本國詳悉別國並不備又往往失實常
欲改正將擬吳越春秋編年以備南北至是無事而恭

仁家富於書籍得恣意披覽宋齊梁魏四代有書自餘
竟無所得居二年恭仁入為吏部尚書大師復還會州
武德九年會赦歸尚書右僕射封德彝中書令房玄齡
並與大師親通勸留不去曰時屬維新人思自效方事
屏退恐失行藏之道大師曰昔唐堯在上下有箕山之
之節不才請暮其義於是束裝東歸家本多書因緝編
前所修書貞觀二年五月終於鄭州滎陽縣野舍時年
五十九既所撰未畢以為沒齒之恨所製文筆詩賦遺

兵火多失落存者十卷子廢孫正禮利王延壽安世延
壽與敬播俱在中書侍郎顏師古給事孔穎達下刪削
既家有舊本思追踪先志其齊梁陳五代舊事目所未
見因於編緝之下晝夜抄錄之至五年以內憂去職服
闋從官蜀中以所得編次之然尚多所闕十五年乃任
東宮典膳丞右庶子彭陽公令狐德棻又啓延壽修晉
書因得勘究宋齊魏之事所未得者十七年尚書右僕
射褚遂良以諫議大夫奉敕修隋書十志復準敕名延

書撰錄因編得披尋時五代史既未出延壽不敢使人
抄錄家素貧又不辨雇人書寫至魏齊周愔宋齊梁陳
正史並手自寫本紀傳依司馬遷體以次連綴之又從
八代正史外更勘雜史為正史所無者一千餘卷皆以
編入頗冗者削之始末終撰凡十六載始成凡八代為
北史南史二書合一百八十卷其南史先寫訖以呈監
國史國子祭酒令孤德棻有乖失者亦為改正許令閻
奏次以北史誌知亦為詳正因徧誌宰相乃上表曰臣

延壽言臣聞史官之立其來已舊典謨載述唐虞之風
尤著誥誓斯陳殷周之烈彌顯魯書有作鹿門貽鑒於
滅孫晉乘無隱桃園取譏於趙孟斯蓋哲王經國通賢
垂範懲誡之方率由茲義逮秦書既煬周籍俱湮子長
創制五三畢紀條流且異綱目咸張自斯以後皆所取
則雖左史筆削無乏於時微婉所傳唯稱班范次有陳
壽國志亦曰名家並見重前修無俟揚摧洎紫氣南浮
黃旗東徙時更五代年且三百元熙以前則總歸諸晉

著述之士家數雖多未聞盡善太宗文皇帝深嗟蕪穢
大存刊勒既懸諸日星方傳不朽然北朝自魏以還南
朝從宋以降運行迭變代有載筆者之篇目史牒不少
互陳聞見同異甚多而小書短書易為湮落脫或殘滅
求勘無所一則王道得喪朝市貿遷日失其真晦明安
取二則至人高跡達士弘規因此無聞可為傷歎三則
敗俗巨蠹滔天桀惡書法不記孰為勸獎臣從貞觀以
來屢叨史局不揆愚固私為修撰起魏登國元年盡隋

義寧二年凡三代二百四十四年燕自東魏天平元年
盡齊隆化二年又四十四年總編為本紀十二卷列傳
八十八卷謂之北史又起宋永初元年盡陳禎明三年
凡四代一百七十年為本紀十卷列傳七十卷謂之南
史凡八代合為二書一百八十卷以擬司馬遷史記就
此八代而梁陳齊周隋五書是貞觀中敕撰十志未奏
本猶未出然其書及志始末是臣所修臣夙懷慕尚備
得尋聞私為抄錄一十六年凡所獵畧千有餘卷連綴

改定止資一手故淹時序迄今方就唯鳩聚遺逸以廣
異聞編次別代共為部帙除其冗長據其菁華若文之
所安則謂其書改雖則疎野遠慙先哲於披求所得竊
謂其書謂其書刊勒已定北史勘校粗了既撰自私門
不敢謂其書經聞奏亦不敢流傳用陳聞伏深戰越

謹言

南北史合注卷一百九十一